

## 佛心經品亦通大隨求陀羅尼

唐三藏法師菩提流志譯

廬山沙門釋子大愚鉛槧

如是我聞。一時佛在俱焰彌國金剛山頂，遍觀十方，皆如火色。爾時如來，雖視眾生平等不二，以眾生不覺故，作如是言：苦哉！苦哉！末法眾生，應如何救？

作是言已，一切諸佛世界，及諸菩薩境界，上自三十三天，下至金剛際，乃至魔王宮殿，悉皆震動。其時，即有過去現在一切諸佛，應念思維；復有諸菩薩等，住持自心而不動轉；復有諸金剛領諸眷屬，執金剛事，遊行十方；復有諸天仙魔眾，惶恐無主，怖走無處。

爾時會中有十金剛藏菩薩，前白佛言：世尊，今者此相，為善相耶，為惡相耶？時佛默然不答。

有金剛愍菩薩者，告金剛藏菩薩言：此相不善。是以佛今入慈心三昧，且自淨心，待佛宣說。

時有德藏菩薩問金剛愍言：云何名為慈心三昧？金剛愍言：住此三昧，慈攝眾生，故名慈心三昧。但各淨心，須臾即見佛心遍一切眾生心。

爾時如來從三昧起，告大眾言：善男子等，末法眾生沉沒殆盡，汝等悉知悉見否？以諸眾生不解我法，不了我心，不到我際，為魔所持，如何得救？誰有善法，能護眾生？誰有良方，能消除眾毒？

時有二十千萬億菩薩，皆是灌頂大法王子，威德自在，前白佛言：世尊，我有菩薩慈。

佛言：此非菩薩慈所能救。

復有百千萬億恒河沙數世界金剛密跡，一一密跡，領四天下力士，前白佛言：世尊，我有金剛力。

佛言：此非金剛力所能救。

復有一切世界大自在天，變身為佛，來白佛言：世尊，我有自在變化。

佛言：非汝幻惑所知。

於是會中有一菩薩，名曰實德，前白佛言：世尊，此諸菩薩金剛天仙，

皆悉不能救護，佛今如何令諸眾生得大解脫？

爾時佛告實德菩薩言：除佛心中心，餘無能救者。何以故？能令諸魔生大慈故；能令諸法隨應現故；諸佛慈護常不離故；菩薩本願亦護持故；能令金剛施威力故；能令天眾常擁護故；藥叉羅刹成助法眾故；諸大鬼神生歡喜故；令持誦者等佛力故、等佛心故、等佛智故、等佛威故；心所作為無不辦故；所有障難皆斷絕故；帝釋梵王常扶持故；能令一切眾生，直成正覺，不退轉故；世間所有事業，自明瞭故；乃至世界一切有通無通、有智無智、賢與不肖，盡歸伏故。

爾時大眾聞佛說已，皆欲聽受。忽見眾中，放大光明，過百千日。爾時實德菩薩問佛言：此為何光？放自何處？

佛言：為歡喜光，放自佛心中心。

實德菩薩言：世尊，此光不可量，不可稱，無可讚歎，亦無印可。何以故？

為同諸佛無印可故、同諸如來無所得故、一切諸相悉皆空故、常住真心無動轉故、一切魔怨不得便故、能遮魔王不善道故。以是因緣，名心中心。

爾時大眾白佛言：世尊，我等從佛受教以來，未曾聞有如是最勝功德，具大威力之妙法。唯願如來慈悲宣說，令我等依法修持，速證覺地。

佛告大眾言：善男子等，有十種行願，今當宣說，如說而行，必證覺地。何等為十？

- 一、佛佛俱信，法法無礙，清淨僧眾，尊視如師；
- 二、持戒不缺，攝心常定，諸法空相，平等無著；
- 三、慈心眾生，勵行戒殺，視眾生如己，不忍食其肉；
- 四、人有所求，等心施捨，溫和謙下，驕慢不生；
- 五、不違本願，常利自他，不自稱讚，不見他過；
- 六、貧富貴賤，性本不二，口常軟語，令生歡喜。心意質直，遠離諂媚，隨順人情，善轉俗諦；
- 七、佛說教誡，體會力行，護持佛法，如護己命。救護眾生，而不望報，眾生驕慢，亦不退心；

八、不輕正法，不使他輕，不謗三寶，不令他謗。有輕謗者，善言開解，令其信入，不墮邪網；

九、常護正念，不虧暗室，勝行堅固，不厭疲勞。發弘誓願，攝心不退，常住大乘，破除邪見；

十、所修本法，一一遍持，清淨密印，莫污染結，須為自利利他而修，不因名聞利養而用。

善男子等，如是行願，能一一受持者，是持法證，決定直至無上正等正覺，更不退轉，欲證菩薩及金剛身，滿足不難。

爾時大眾聞已，白佛言：世尊，一一行願，勉力修學，唯願如來，不吝大悲，宣說神妙章句。大眾渴仰，樂欲受持。

佛言：善男子等，樂聽佛說，諦聽諦聽，善思念之。

時佛即以菩提心印攝護大眾，令心不動，而說一切佛心中心大陀羅尼曰：

唵 跋勒跋勒 三跋勒 三跋勒  
 印地尼雅 尾朽達尼 哈 哈  
 嚕嚕洽尼 喀嚕洽尼 司瓦哈

### 第一菩提心印：

先以左右二手二無名指，各屈鉤於中指後，二大拇指各屈捻二小指甲上，二頭指各屈鉤二無名指頭，二中指直豎頭相拄，二頭指頭亦相拄，合腕當胸，其印即成。

若人修持此印法者，證菩提心，具菩薩智，一切波羅密門，攝無不盡。所有諸佛菩提及諸密門，皆此印攝。受持此印經七千遍<sup>1</sup>，次修以下諸印，方為有主。修此印時，應念即有十方諸佛雲集其頂，十方菩薩侍從諸佛，十方金剛為佛給事，十方諸天供侍諸佛。諸魔眷屬悉捨本土，隨從諸佛，來助法威。一切毗那夜迦為供佛故，亦來聚會。善男子等，此印為諸佛之首，諸法之母，諸印之王。十方諸佛從此而生，與佛等量，無有過者。修此印時，慎勿生瞋。若生瞋者，十方浩沸，慎之！慎之！莫不淨用。

<sup>1</sup> 即七日，每日千遍

### 第二菩提心成就印：

先以左右二手二中指，右押左相交於虎口中出頭，二無名指各屈押二中指背上，二拇指各捻二無名指頭相並，二頭指於二無名指背上頭相拄，二小指相並直豎，其印即成。

若善男子善女人，得此印持者，轉業消障，速證無上正等正覺。常修此印，得聞持不忘，于諸法要，自然通達；從久遠來所未持者，應心所作，悉皆契合；世間諸病，無論輕重，但結印念咒一日，癩病亦除，何況餘疾，除不至誠。若修此印，縱無速效，亦莫輕捨。殷重深心，久習成就，慎勿妄用，損其靈驗。

### 第三正受菩提印：

先以左右二手無名指，各於中指頭指二間出頭，次以二中指二頭指四指齊頭相著，二大拇指各捻頭指上節紋，二小指相並直豎，合腕成印。

若有欲持佛菩薩金剛心法者，依修此印，應念即證不動智。所有十方聖與非聖，魔及非魔，並諸天仙四果聖人，諸大鬼神等，同時即將本心共同契合；所有事業，無論世出世，了性無二。何以故？同佛心故，得佛三昧故，諸佛密藏由此攝故，諸佛頂輪由此成故，一切金剛依此住故，十方聖眾來歸從故，諸惡眾生回向善故，一切障礙自消除故，天魔波旬自降伏故，一切諸法皆現前故，諸佛菩薩順逆法門自了知故，大小願求皆果遂故。修印之前，先念三皈，發持戒心，攝心淨持，慎勿惑亂，無論朝夕，結印誦滿千遍，十方如來，自助其力。一切外道，諸餘法術，欲令破者，舉心即破。慎勿輕用，若輕用者，一切滯礙，無有成者。若諸印法，久修不成，結持此印，日滿千遍，七日之間，無法不成。勤苦修學，經三七日，證本覺心。

### 第四如來母印：

先以左右二手合掌，二小拇指右押左交屈入掌中，二頭指各鉤小指頭，二大拇指並押二頭指中節，二無名指直豎頭相並，二中指頭繞向二無名指後亦相並，四指齊頭，合腕成印。

若持此印者，心念十方諸佛七遍，然後結印。若遇大月十五日持滿萬遍，得大自在。諸佛寂定，我亦寂定；諸佛三昧，我亦三昧；諸佛說法，我亦說法；諸佛度生，我亦度生；諸佛無礙，我亦無礙；乃至諸佛種種所作所為，我皆能作能為。何以故？因此法中，具八種母故，及八自在故。我從八自在而生，更無別法。此印能攝八方自在力，一一方各有八方，一一方復有八種隨心。何等為八？一、變化隨心；二、慈悲隨心；三、救苦隨心；四、說法隨心；五、順逆自在隨心；六、攝諸法要隨心；七、止惡修善，直至成佛無有退轉隨心；八、世間所有果報福德，欲施即施，欲捨即捨，欲修即修，欲成即成隨心。善男子等，如是八種隨心中，一一復有百千恒河沙隨心事，不可具說。若欲求者但於晨朝結印修法，一一隨心，乃至欲求佛位、菩薩位、金剛位，求生西方，或十方自在生者，唯當至心思念所求，日日如法修持，無不果遂。善男子等，當知此印，唯佛與佛方能究竟，非餘聖所知；唯菩薩願大者，相應最速；唯佛授與，非金剛能授。善男子等，若持此印，十方所有通靈，無不識知，無不攝受，無不頂禮，無不歸從，無不加護，十方如來無不印可。寧謂佛心動轉不定，不可說此印有不定相。何以故？佛心無有動轉故。當知此印，諸佛執持，非菩薩手。若有菩薩，不從佛受，能得此印者，無有是處。若有金剛，不從佛受，能得此印者，亦無是處。十方世界，一切諸天，不見不聞。何以故？佛不授與故。善男子等，我此印法，久事我者，我始付授；同我心者，我亦付授；具大慈悲，我亦付授；長養法性，我亦付授；能度眾生，直成正覺，我亦付授；依我經教，行持不忘，我亦付授；能為眾生作決定者，我亦付授；能令眾生堅持戒行，不為魔轉，我亦付授。善男子等，當知此印不可思議，故不輕授。若既受得，必須珍重，勿妄宣傳，勿與非人，慎之慎之！

#### 第五如來善集陀羅尼印：

先以左右二手合掌，二中指右押左交於掌中，二大拇指左押右，各捻本中指如環，二無名指二小指同豎相並，二頭指捻二無名指上節紋成印。

若善男子善女子等，欲持此印，先於晨朝至心稱念三世諸佛，心向十方說三皈法，然後結印。此印威力與佛力等，若求無上菩提者，修持之力最為

殊勝。惡心眾生，勿妄宣傳，縱傳無效，從生疑謗。善男子等，當知此印，如來身心，何以故？能攝諸法自通達故，攝諸藏門常在心故，能攝聖眾作輔弼故，能攝一切菩薩金剛救眾生故，能令一切大神護世間故。是以此印任傳於何等眾生手，其眾生即我菩提所生，得菩提記。故知此印，力同諸佛。若持此印，縱墮地獄，能令地獄罪苦眾生，應念生天。我現病身，入諸地獄，救護眾生，常用此印，更無餘法，能與等者。若使我說，劫劫相續，亦不可盡。

### 第六如來語印：

先以左右二手合掌，以二無名指二小指同右押左交叉於掌中，以二大拇指左押右捻二無名指二小指甲上，二中指二頭指並豎直伸，拆開二分成印。

若善男子善女人，或聞此印，或見此印，其人累劫重障，自然消滅。若持此印，或行或住，或坐或臥，先念三皈，然後結印。此印效力，無可比喻。即過去現在一切諸佛，亦無知此印力者，持之得通，不知根際。我今雖說付授，亦不知根際。當知久遠諸佛，遞相付授，遞相承受，遞相印可，遞相授記。少善根或無善根眾生，勿令見此印法，慎之！慎之！

爾時世尊說諸印法已。一切菩薩金剛及諸大眾，咸欲修持，乃問佛言：世尊，此諸印法，我等應從誰受？從誰灌頂？誰為加護？曾有何人修持此法？我等今者欲請作師。

佛言：汝等且待須臾。

時佛密持如來語印，遍召十方一切持心中心者速來，此間大眾欲見。作是語已，多羅菩薩，持菩提心印，眷屬圍繞，從東方來，現身為佛，一切大眾，現菩薩身，俱詣佛前；堅意菩薩，持菩提心成就印，從南方來，化身為佛，一一眷屬，皆為菩薩身；心王獅子吼王佛，持正授菩提印，從西方來，所見眾生，無論善惡，以印指之，悉成正覺；最勝如來下一童子，年十四歲，持如來母印，從北方來，所經諸國，有大夜叉、大黑鬼、吐火神，如是等類，以母印指之，皆發慈心，護送童子，同到佛所，同得佛心，受菩提記；師子音佛，持善集陀羅尼印，從下方來，百萬億陀羅尼神以為眷屬；香積如來下一童子，與普光如來下一童子，同持如來語印，從上方來。

爾時佛告大眾言：六方所來，皆有師承，蒙佛神力，俱得大通。更有一人，足為近證。

佛即呼言：光明童子善來！

彼時童子住在雪山，聞佛呼聲，乘空而至。時大眾謂童子曰：如來喚汝來，為我等作師。今眷屬何在？童子答言：我之眷屬，汝等即是。大眾言：我等與汝，曾不相識，云何是汝眷屬？童子即密持如來語印，指向大眾。爾時除佛化身外，諸餘菩薩，盡皆禮此童子而不自知。禮訖白言：仁者，我等今者請仁者為師。童子言：如來語印，實無虛妄，汝等大眾，一心奉持，如我無異。

爾時大眾白佛言：世尊，光明童子修如來語印幾久，有如是力，能攝我等？

佛言：汝等菩提未圓，所以被攝。汝等諦聽，今說童子修持因緣。我昔初住雪山修行，有諸蟲獸，互相吞噬。我時定中，憶念空王如來所說此咒，始宣一遍，諸蟲獸等，皆得佛心，不復互噬。持念稍久，俱得菩薩戒，而食草卉。時光明童子詣山供我，適我持。次聽得此咒，復盜本印而去。修學七日，得如是力。後復遇我，即以印力攝我，為我所持故，了不相攝。汝等當知，盜法尚有如是大力，何況正授！

大眾聞已，白佛言：世尊，唯願賜授法要，令我等同此童子，威神自在。佛言：汝等卻後七日，當得此通。一切事業，俱不廢置。唯有惡心，及嫉妒心，修法無效。若無惡妒，速證不難。

大眾白佛言：世尊，唯願印可，唯願印可。速證覺地，與佛心等。

爾時如來為印可大眾故，以正授菩提印，指十方三遍，即有黑風吹諸菩薩，悉皆顛撲。旋復赤雲遍現，雨細檀香，熏大眾心；次雨香水，浴大眾身。熏浴已畢，應時得語通自在。得自在已，遍修諸印，皆同佛心。

時諸大眾，得此印力，歡喜踴躍，同聲讚佛，偈言：

善哉天人師，具足一切智。

所有眾生類，悉蒙大解脫。

眾生具佛智，及佛功德力。

乃至妙法身，凡愚亦無減。  
真言加持力，一切皆顯現。  
是以凡夫音，與佛語無異。

爾時文殊師利法王子，復以神通遍告十方而讚佛言：

善哉大日尊，慈光遍法界。  
微妙淨法身，顯現稀有事。  
眾生業垢重，久修亦難成。  
蒙佛加持力，剎那同佛心。  
生死巨海中，佛為大導師。  
迷失覺路者，速依佛道行。

爾時如來偈告大眾言：

一切諸道中，無逾於佛道。  
一切上妙法，無過心中心。  
以心示眾生，眾心即佛心。  
如是大威力，非眾生所知。  
恒河沙數劫，我始一付授。  
若能依法修，即同我本心。  
若有至誠者，夢授成就因。  
今說夢中因，汝等當諦聽。  
或見佛光明，或承佛灌頂。  
或升大樓閣，或臨大江河。  
或乘車馬駛，或載舟航行。  
或登大高山，或入佛塔寺。  
或與大法會，自為說法主。  
或為工畫師，或展誦經卷。  
或入水不沒，或近毒無傷。  
或遇險得脫，或臨難無畏。

或見佛相好，或睹清淨僧。  
或觀日月星，或見龍馬象。  
或地中發火，或毒蛇馴服。  
或自見面像，或現莊嚴身。  
或吃美飲食，或吐污穢物。  
或見美女人，而無不淨心。  
或行廣大路，或入高大城。  
或一絲不掛，或自在入浴。  
或大小便溺，或自心懺悔。  
或父母死亡，或自身物故。  
或明醫良藥，或久病初愈。  
或孕婦產生，或提攜嬰兒。  
或鮮花美果，或清水泳魚。  
或蓮花未敷，或自坐花上。  
如是種種相，或於定中現。  
乃至修法時，耳聞說法音。  
或一言半句，或長篇大論。  
一一感應兆，應當勝精進。  
無論夢或定，有一示現時。  
皆為成就相，進修而無疑。  
莫於無信人，輕泄秘密機。  
勿近惡知識，勿得少為足。  
不取亦不捨，不欣亦不厭。  
任運依法行，即身成正覺。  
爾時大眾聞佛說已，歡喜踴躍，禮佛而住。

爾時阿難在大眾中，戚然憂慮。一切菩薩、諸大金剛、龍王神仙、釋梵四天等，悉皆迷悶，頓失光明。唯有諸佛能知其因，各各安坐，放光慰問。毗盧遮那如來，更放無量大威德光，其光普照，凡被照者，皆得安穩。復於

光中出妙音聲，告諸佛言：諸大聖者，此威光難知，此威光難測，唯有大聖等正覺者，能知此光，能測此光。于時阿難心有所省，即起禮佛，問毗盧遮那如來言：世尊，此光果唯諸佛能知，非餘所知耶？佛言：善男子，唯佛能知，非菩薩正覺未等者所能知也。阿難復以偈問曰：

世界有菩薩，示現為佛身。  
世界有菩薩，能化無邊身。  
世界有菩薩，能知佛所知。  
世界有菩薩，能解眾生縛。  
世界有菩薩，遍入諸佛刹。  
世界有菩薩，示現善方便。  
世界有菩薩，忍受眾生苦。  
世界有菩薩，廣攝諸群生。  
如是菩薩等，皆是灌頂王。  
示同諸佛身，應念現諸境。  
神通波羅密，其實不思議。  
能於急難中，無畏大自在。  
我觀諸菩薩，與佛等無異。  
若具受持者，同佛不思議。  
護持佛法藏，作眾生明炬。  
即此法雲頂，皆是滿足位。  
云何大菩薩，不知此因緣。  
菩薩尚不知，凡愚何能解。

爾時毗盧遮那佛，仍於光中，出妙音聲，告阿難言：善哉！佛子！以此等菩薩雖有慈，慈不遍故，所以不知；雖有悲，悲亦不遍，所以不知；乃至雖有忍通力等，示現無礙，以不遍故，所以不知。若一一遍者，佛果圓滿，方知此事，佛果未圓，云何能知如來量處。阿難，汝言菩薩尚不知，凡愚何能解。釋迦牟尼佛次當宣說，解汝所問。

爾時阿難，即問釋迦牟尼佛言：世尊，此事云何？唯願慈悲開示，令我如說修行，轉示一切眾生。

佛言：阿難，我今示現神力，汝可遞相告知，慎勿驚怖。

阿難受敕，轉告大眾，不覺同時身騰虛空。大眾仰觀，謂是阿難得無礙通。其時告語，聲震十方，盡皆聞知。阿難白佛言：世尊，遍告已訖，唯願開示。佛即入慈心定，憶念心中心咒。念已，以右手中指指向南方，以足大指按地。其時所有世界地獄，湧升虛空；復于一切地獄上方，雨寶蓮花，破諸地獄。時諸地獄，無有一人受其苦者，離諸垢穢，得法眼淨；復有諸大夜叉，及羅剎王，釋梵護世，一切餓鬼阿修羅王等，皆得大通。所謂通者，廣大慈悲，普覆眾生，心無障礙，與佛無異；復有大通，於虛空中，雨微細雨，凡所願求，皆得滿足，嬰重病者，皆得除癒，餓者飽滿，熱者清涼；復有大通，遍十方所有眾生，處母胎者，為小兒者，即能憶識過去心地，知所生處，往世經過，皆能記憶；復有大通，其通光明，遍十方界，一一界中，諸佛聖人，悉皆明現，無有障礙，三界眾生，盡離諸苦，同佛壽生；復有大通，其通光明，現五種色，一一色中，各有五百萬億那由他恒河沙化佛，及大菩薩眾，同說佛心中心，所有法要皆能瞭解；復有大通，其通光明，遍十方刹。其時大地震動三十六返，日月星宿，應時殞落，魔及魔民，皆捨魔業，退失威神，俱得佛通，憶識本所受業，生大懺悔，發出家心，無不定者。

佛告大眾言：善男子等，此通光遍十方界，有大威德，三明六通，具八解脫。如法修者，直至成佛，不受異生。何以故？以毗盧遮那為一切佛母常住持故；有所希求，皆滿願故；為一切學者灌頂證明故；為知佛心者，遣諸金剛藏王密跡菩薩，蔭覆其人，令除障難故；復令諸天常圍繞故，一切鬼神非人等，順從護衛故；乃至以種種善巧方便，令如法修證佛心者，皆得成就。

阿難復白佛言：世尊，本妙覺心，一切菩薩金剛久修佛行，堅固不退，方得成就。今凡愚下劣，欲樂修者，云何不經長劫，立證佛心？唯願慈悲，為我解說，令諸眾生，無有疑惑，不久勤修，速證覺地。

佛言：善哉！善哉！汝欲知者，我今當說。阿難，諸佛境界，非眾生所知，眾生根行，唯佛能了。有諸眾生，依自心力，累劫苦行，方成菩提者；有諸眾生，依仗佛力或咒力，即身熏修，頓超覺位者，此中微妙，唯佛與佛，乃能究竟。阿難，此心中心咒，但以慈悲心，日持千遍，持滿千日，佛心自成。

阿難復白佛言：世尊，修此法時，應結如何壇界？應擇如何處所？乃至藥品、護摩、香花、供養，種種莊嚴，各各應當如何？唯願一一開示。

佛言：阿難，佛心非相，亦非離相，一相無相為壇場，真實不虛為處所，本來無染為藥品，究竟清淨為香花，不離覺心為供養，無智無得為莊嚴，以空慧火，燒盡煩惱為護摩。若著相修，能至究竟者，則一切外道，皆為正法。何以故？憶念往昔住尼佉羅山時，有諸咒仙，修種種法，彼等不識我故，以為惡人，作諸法術欲降伏我，經七日間，殊無靈驗，唯自憔悴，我時憐憫，語諸仙言：當知盡汝等全力，縱經一劫，不能害我。諸仙言：汝得他心智耶？我言：已得。復問我言：聖者，云何得智，不為我等所害？我言：仙眾，汝妄我真，汝邪我正，汝虛我實，汝諂我直，汝著有無，我無邊見，汝是枝葉，我為根本。豈有枝葉損根本，螢火損日光，微土能竭巨海，蟻子克撼大山耶！諸仙聞言，心生瞋恨，以諸星術怖我。我時攝心正定，念咒七遍，以氣噓天，日光頓失；我復吹地，大地震搖；心復召請諸佛，應時俱集；眼復周顧十方，諸仙惶恐，同時降服，求哀懺悔。俱言：唯願救護，施我等以無畏。我即慈心觀攝，皆得安穩。阿難，若諸仙之著相法為究竟者，不應為我無著心法所破。唯一是實，餘二非真。一法尚不可得，何況外道法耶！若人修出世法，不依無著妙心，而能究竟成就者，無有是處。

阿難復白佛言：世尊，此為覺心大士境界，其未登覺地者，應如何持？光本無相，而見有明暗；聲本不二，而聞有悲歡；氣本無性，而嗅有香臭；藥性本空，而味有甘苦；乃至或善或惡，或有或無，或長或短，或是或非，分別無量，幻化非一。云何令具分別心之凡夫，遽修無分別行耶？

佛言：善哉！善哉！一切凡夫，能以戒行修此心法者，即同我心，亦同我力。如戒行清淨，而修法無成者，我言虛妄，魔而非佛。阿難，若有眾生，以深信心，修持此法，當知其人，必定成佛。若不成者，我即退位，入阿鼻獄。

爾時，如來為阿難及未來一切眾生，除疑惑故，復以偈言：

一切佛境界，非眾生所解。

唯有佛與佛，乃能究竟知。

過去現在佛，同住真常心。

眾生了此心，即成無上覺。  
 若持心中心，速證無生忍。  
 乃至大覺位，即身亦證得。  
 十方無量佛，皆從佛心生。  
 一一佛心中，攝入心中心。  
 所有世出世，善巧諸方便。  
 言說及論著，秘密陀羅尼。  
 諸佛轉法輪，降魔除眾苦。  
 無緣大慈力，同體悲心智。  
 喜捨無量心，五眼及六通。  
 十八不共法，一切波羅密。  
 三十二聖相，八十隨形好。  
 種種佛功德，皆由此法生。  
 所有諸眾生，若持心中心。  
 亦如過去佛，具足一切智。  
 凡夫發勝心，頓超菩薩位。  
 彈指成正覺，皆是佛心力。

佛說偈已，復以神通力，於虛空中，成一寶蓋。其寶蓋中，有百億恒河沙那由他不可說不可說化身佛，復有不可說不可說報身佛，復有不可說不可說法身佛。一一佛，皆有無量無邊十地菩薩眷屬圍繞，是諸菩薩等，皆為人中導師；復有無量聲聞緣覺、梵釋四天、阿修羅、羅剎夜叉眾等，乃至一切大威德者、大神通者、大護念者、大慈悲者、大自在者，悉共圍繞；復有無數地神，各持千葉蓮花，承此寶蓋，前後圍繞，現光明身，其光皆紫磨黃金色。一切眾生，見此光者，超脫三界，入正定聚。時阿難聞佛偈言，及睹神變已，以偈讚佛：

善哉本師釋迦文，一音圓演大千界。  
 密言加持利眾生，永度生死超輪迴。  
 善哉如來大日光，遍照無邊眾生海。  
 無明障破法眼淨，覺路坦坦自在行。

善哉如來大力士，施眾生以大無畏。  
 貪瞋癡毒皆消滅，慈慧莊嚴具捨心。  
 善哉如來獅子吼，出語大千皆震動。  
 破裂眾生邪見網，扶植如來正覺林。  
 善哉如來慈悲雲，遍覆一切諸有情。  
 甘露法雨蒙澤潤，柔和善順寂靜心。  
 善哉如來大寶王，無上法寶施眾生。  
 開發無量功德藏，自利利他永無盡。  
 善哉如來大樹王，普蔭熱惱諸有情。  
 心得清涼大自在，永離諸苦究竟樂。  
 善哉如來大法鏡，照破眾生諸心影。  
 本來面目全體現，無人無我畢竟空。  
 善哉如來大雷音，眾生聞已覺芽生。  
 定慧日光大悲水，菩薩花開佛果成。  
 如來功德無數量，永劫讚歎亦靡盡。  
 聊說大海一浮漚，願佛慈悲哀攝受。

爾時，阿難偈讚佛已，復白佛言：世尊，如是因緣，如是神力，如是自在，如是決定，昔未曾聞，佛以何緣，今乃說爾？如來一切智者，知眾生沉淪苦海，昔何不說如此妙法，普令眾生早已得度？

佛言：阿難，此心中心法，常住法界。我未出世，此心出世；我未受生，此心受生；我未得定，此心先定；我未發慧，此心先慧。如此定慧，是佛住處，是佛行處，佛思維處，佛決定處。一切菩薩金剛，乃至下愚凡夫，不依心法行，而能成正覺者，無有是處。惟眾生心病，因時輕重。如來法門，應病與藥。末法眾生，障深垢重，非此妙法，無由得除，故昔不說，今始付授也。

阿難復白佛言：世尊，如來心地，十地菩薩，猶不能知，何況下愚凡夫。未來眾生，欲修此法，而心不了，願垂慈悲，為說相貌。

佛言：阿難，有十二種心，是心中心相貌。何等為十二？

一、不厭自苦，不嫉他樂，不矜自樂，救護他苦；

二、一切眾生，皆過去父母，救護眾生，如子救親想；  
 三、不惱眾生，常行利他，種種方便，善為引導；  
 四、佛四念處，作出離想，如念修學，常不放逸；  
 五、諸佛法要，淨願因行，發決定心，勤學不退；  
 六、以佈施度慳吝，以持戒度貪染，以忍辱度忿怒，以精進度懈怠，以禪定度散亂，以智慧度愚癡；

七、七菩提分，常須勤修，修而不著，不假對治；  
 八、依八正道，作勝行處，依聖言量，為軌範師；  
 九、佛及僧寶，接足承事，所禮佛像，不輕慢禮；  
 十、須具十信：

信佛常住，未曾涅槃；  
 信佛大悲，常拔眾苦；  
 信佛大慈，常與眾樂；  
 信佛平等，無愛憎心；  
 信佛不厭，常行方便；  
 信佛神通，不時示現；  
 信佛言教，真實不虛；  
 信佛法力，不可思議；  
 信佛密法，有決定力；  
 信佛末世，不捨眾生。

十一、深觀諸佛，如在目前，諸魔遠離，永無障礙；

十二、諸法空相，亦非斷常，非中道義，不住不離。

阿難，修法眾生，若能如是心行者，決定成佛，更無疑也。

阿難復白佛言：世尊，如此相貌，乃佛境界，云何眾生，能行此心？

佛言：阿難，一一相貌，盡力所能，不能全行，但自修法，必定成就，非眾生心所測。若眾生心能測者，不名為佛心也。

爾時如來說此法已，一切菩薩金剛天人身光皆悉不現，唯有佛光，遍照閻浮提。其時諸天人眾，於虛空中，自然旋轉，魔宮傾覆，所有諸魔，消滅無餘，大地六返震動。時有十方世界諸菩薩眾，持諸華幢，來供釋迦牟尼佛。

諸華幢中，出妙音聲，同說心中心法。諸菩薩等以心中心力，示現種種神變，偈讚佛光言：

善哉此光明，是佛心中心。  
 不遍大千界，僅照閻浮提。  
 南洲末法時，眾生心垢重。  
 唯佛心中心，能滌心污垢。  
 非一切菩薩，金剛與天人。  
 法力所能及，身光故不現。  
 善哉此光明，乃佛心中心。  
 煩惱諸毒空，故魔王殄滅。  
 善哉此光明，乃佛心中心。  
 清淨心顯現，故菩薩眾聚。  
 乃至鬼神類，羅刹藥叉等。  
 一切剛強眾，皆令調柔順。  
 如來心中心，功德等虛空。  
 諸佛同時說，窮劫亦不盡。  
 百千萬億海，不及大海王。  
 無量眾小山，弗與須彌等。  
 所有諸星光，無比日月明。  
 一切薩婆若，何及心中心。  
 我等菩薩行，經修無量劫。  
 所有諸菩薩，未悟心中心。  
 如來心中心，唯佛乃能知。  
 今雖讚其德，不及一毫毛。  
 我等願修學，速圓佛果海。  
 並願諸行者，悉皆成正覺。

爾時大眾，聞佛所說，及讚歎已，一一合掌，持佛心中心。佛即舒金色臂，摩大眾頂，普為授記。時大眾蒙授記已，歡喜奉行，禮佛而去。<sup>2</sup>

<sup>2</sup> 佛心經亦通大隨求陀羅尼終